



Broj: 01-02-1-2884/17
Sarajevo, 15. 12. 2017.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 18-12-2017

Organizaciona jedinica	Klasifikacione oznake	Redni broj	Broj priloga

B

ZASTUPNIKU
U ZASTUPNIČKOM DOMU
PARLAMENTARNE SKUPŠTINE
BOSNE I HERCEGOVINE

Predmet: Prijedlog zakona o izmjeni Zakona o državnoj službi u institucijama Bosne i Hercegovine, dostavlja se

Sukladno Odluci Kolegija Zastupničkog doma Parlamentarne skupštine Bosne i Hercegovine s 32.sjednice, održane 14. lipnja 2016., u pritvku Vam dostavljam Prijedlog zakona o izmjeni Zakona o državnoj službi u institucijama Bosne i Hercegovine, predlagatelji: zastupnici Salko Sokolović, Senad Šepić i Sadik Ahmetović, koji je Odjel za lektoriranje Tajništva Parlamentarne skupštine Bosne i Hercegovine lektorirao na bosanski, hrvatski i srpski jezik.

S poštovanjem,

Prilog:

- Prijedlog zakona

Dostaviti:

- naslovu
- a/a



Prijedlog

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na __. sjednici Predstavničkog doma, održanoj __. __. 2017. godine, i na __. sjednici Doma naroda, održanoj __. __. 2017. godine, usvojila je

ZAKON O IZMJENI ZAKONA O DRŽAVNOJ SLUŽBI U INSTITUCIJAMA BOSNE I HERCEGOVINE

Član 1.

U Zakonu o državnoj službi u institucijama Bosne i Hercegovine ("Službeni glasnik BiH", br. 12/02, 19/02, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10 i 40/12) u članu 28. (Postavljenje državnog službenika) st. 1. do 3. mijenjaju se i glase:

„Član 28.

1. Agencija postavlja kandidata na radno mjesto državnog službenika iz člana 7. stav 1. tačka b) Zakona koji je u izbornom procesu ostvario najbolji rezultat.
2. Rukovodilac nadležne institucije, uz prethodno pribavljeno mišljenje Agencije, imenuje kandidata na radno mjesto državnog službenika iz člana 7. stav 1. tačka a) Zakona koji je u izbornom procesu ostvario najbolji rezultat.
3. Državni službenik iz st. 1. i 2. ovog člana postavlja se u skladu s odredbama ovog zakona i Zakona o ravnopravnosti spolova u Bosni i Hercegovini („Službeni glasnik BiH“, br. 16/03 i 102/09).“.

Član 2.

Ovaj zakon stupa na snagu osmoga dana od dana objavljivanja u „Službenom glasniku BiH“.

Predsjedavajući
Predstavničkog doma
Parlamentarne skupštine
Bosne i Hercegovine

Predsjedavajući
Doma naroda
Parlamentarne skupštine
Bosne i Hercegovine

O B R A Z L O Ž E N J E

I. Ustavni osnov za donošenje zakona

Ustavni osnov za donošenje ovog zakona sadržan je u članu IV4.a) Ustava BiH prema kojem je Parlamentarna skupština BiH nadležna za donošenje zakona koji su potrebni za provođenje odluka Predsjedništva ili za vršenje funkcije Parlamentarne skupštine BiH po ovom Ustavu.

II. Razlozi za donošenje zakona

Razlozi za donošenje Zakona o izmjeni Zakona o državnoj službi u institucijama Bosne i Hercegovine (u daljnjem tekstu: Zakon) zasnivaju se na stvarnim potrebama koja su proizašla iz praktičnih primjena Zakona ("Službeni glasnik BiH", br. 12/02, 19/02, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10 i 40/12), a koja imaju za cilj poboljšanje postojećih procedura prilikom postavljenja državnog službenika kako bi se smanjile neregularnosti prilikom njegovog izbora, te da se državna služba učini profesionalnijom i odgovornijom, a time i efikasnijom u skladu s tačkom 13. Reformske agende za Bosnu i Hercegovinu za period 2015. – 2018.

III. Principi na kojima je zasnovan prijedlog zakona

Ovim izmjenama želi se postići dosljedna primjena člana 3. Zakona, kojim se propisuje da državna služba osigurava poštivanje i primjenu principa zakonitosti, transparentnosti i javnosti, odgovornosti, efikasnosti i ekonomičnosti te profesionalnosti i nepristrasnosti. U tom smislu, predloženom izmjenom Zakona osigurava se postavljenje najuspješnijeg kandidata s liste uspješnih kandidata na radno mjesto državnog službenika te smanjenje zloupotrebe kroz dosadašnji mehanizam diskrecionog prava gdje su nerijetko najlošiji kandidati s liste izabirani na oglašenu poziciju. Također, predloženom izmjenom želi se zaista postići zakonitost pri zapošljavanju gdje ne bi bilo mjesta sumnjama i špekulacijama zašto je određeni kandidat bio imenovan, a nije najuspješniji kandidat.

IV. Finansijska sredstva za provođenje zakona

Za provođenje ovog zakona nisu potrebna dodatna finansijska sredstva.

ODREDBA ČLANA ZAKONA KOJA SE MIJENJA

Član 28.

Postavljenje državnog službenika

1. Državnog službenika postavlja Agencija u skladu s rezultatom koji je kandidat postigao u izbornom procesu.
2. Rukovodeće državne službenike imenuje nadležna institucija, po prethodno pribavljenom mišljenju Agencije, s liste uspješnih kandidata koji su prošli javni konkurs.
3. Ukoliko se ne izvrši imenovanje iz stava 2. ovog člana u roku od 30 dana od dana prijema mišljenja Agencije i liste uspješnih kandidata, ako posebnim propisom nije određen kraći rok, Agencija će po službenoj dužnosti imenovati najuspješnijeg kandidata.
4. Rezervna lista uspješnih kandidata čuva se do isteka probnog rada postavljenog državnog službenika.
5. Postavljenje se vrši upravnim aktom objavljenim u "Službenom glasniku BiH". Prije preuzimanja dužnosti, postavljeni državni službenik prima pismeni opis svog radnog mjesta i opis uslova službe.
6. Akt o postavljenju sadrži:
 - a) ime i prezime državnog službenika;
 - b) naziv institucije u kojoj je državni službenik postavljen;
 - c) naziv radnog mjesta i platni razred.
7. Postavljeni državni službenik preuzima dužnost polaganjem zakletve vjernosti. Tekst zakletve utvrđuje Agencija. Potpisani tekst zakletve je sastavni dio ličnog dosjea državnog službenika.
8. Ako postavljeni državni službenik neopravdano ne preuzme dužnost, organ koji je izvršio postavljenje poništiti će rješenje o postavljenju u roku od 15 dana od dana predviđenog za preuzimanje dužnosti, i u tom slučaju se to lice suspendira od učešća na javnim konkursima za zapošljavanje državnih službenika u institucijama u periodu od dvije godine od pravosnažnosti akta o poništenju.